

卷十

嘉慶川湖陝靖寇記 五

同 同 七 六

嘉慶川湖陝鄉兵記

嘉慶畿輔靖兵記



門 伊 8  
號 677  
卷 8



聖武記卷十

嘉慶川湖陝靖寇記六

邵陽魏源撰

五年六月教首劉之協被禽于河南時邾縣翟家寨有  
千賊新起吳熊光駐防盧氏布政使馬慧裕乘其烏合  
撲滅之知劉之協脫逃旋獲諸葉縣奏聞 上以劉  
之協首創邪教毒流五省通誅數載特命侍郎高杞侍  
衛與常馳驛檻送至京 御製邪教說以但治從逆  
不治從教之旨宣示中外是年冬安徽民張全習邪教  
令其子張效元與同教三人潛出嘉峪關赴喀什噶爾

成所訪其教首王發生效元回至四川賊營畏罪出首  
詔遞回原籍父子免死以安反側額勒登保六月  
復追陝賊由棧道入隴于是南山無賊乃遣楊遇春並渭  
西上擊汧隴之賊遣穆克登布由徽縣兩當擊秦州之  
賊而分兵扼棧道防其折竄時長麟所追伍金柱張士  
龍冉學勝等與楊遇春所追高馬等皆至秦州因渭河  
有備不能北渡合隊順渭而東衆二萬夜襲長麟軍于  
徽縣將軍富成敗死額勒登保檄官兵嚴防棧道及渭  
河北岸復令穆克登布赴楊遇春軍而自率慶成等馳  
扼害載與恆瑞夾擊七月賊竄棧不遂復折奔西和成

縣楊遇春移軍西剿而高馬戴諸賊已合隊東南犯略  
陽沔縣西鄉總兵札勒杭阿提督王文雄先後戰死恆  
瑞以兵四千赴西鄉其張冉伍等賊自階州折回遇楊  
遇春穆克登布阿哈保等三路會擊禽斬三千餘賊潰  
赴太平河與辛聰顏勝可等合奔沔略而總督長麟亦  
自岷州追至與額勒登保合八月慶成斬宋麻子楊遇  
春斬伍金柱乃以階文餘匪令長麟督阿哈保穆克登  
布剿之而迎擊冉張等于沔縣時秦鞏西北之賊盡折  
回陝而高馬等賊屢冒官兵渡漢均爲北岸鄉勇所扼  
額勒登保檄關騰劉之仁嚴防漢北九月楊遇春慶成

搜餘匪于漢南小巴山各賊與高戴合隊四千突出衝陣官兵奮擊山溝禽斬千計適恆瑞邀擊馬學禮徐天德二賊亦至安康額勒登保自漢中進軍西鄉策應楊選春遣兵斷二賊之援先攻馬賊禽斬千徐天德走全河口恆瑞軍邀之其棧道以西長麟督剿之賊一伍金柱餘匪二千一伍懷志賊千餘一曾芝秀賊千餘阿哈保穆克登布分剿北竄棧道不遂皆折渡漢江由是棧道以西漢江以北皆無賊賊皆偪歸漢南紫陽安康所竄川楚之賊較衆額勒登保進軍剿之棧道防兵

下漢江沿岸而檄慶成長麟嚴防南鄭寧羗杜其折竄十月額勒登保奏言日下各路賊勢如曾芝秀徐天德樊人傑已先後偪入川境惟冉張龍三賊在川陝邊界王廷詔高馬二賊在陝楚邊界而有楚兵攔其前楊遇春慶溥追其後勢亦必歸入川德楞泰勒保已進巴州南江又有七十五分擊大兵雲集自可無虞滋蔓臣卽應整旅入川而陝楚之賊未竣先遣阿哈保將兵勇二千協剿川賊此外陝甘兵三萬皆歸慶成節制分將分段以防川賊竄陝之路于是額勒登保進軍紫陽安康欲驅龍張冉苟四賊與高馬合隊而檄諸軍四面會剿

羣賊望風東奔。楚額勒登保以兵勇二千馳赴二竹。適楊遇春等追徐天德。王廷詔高馬諸賊自茅坪至。與大軍夾擊破之。賊走西南。時漢江以北。因伍懷志數百賊竄南山老林。穆克登布等兵七千爲其牽綴。慶成調各路分防。兵未集而川賊爲德楞泰剿急。已由略陽分竄入陝。慶成遣副將海洪阿以兵勇三千與阿哈保分禦西鄉。賊半竄回川。半趨白沔峽江岸。涉淺北渡。慶成遣綸布春汪啟追之。留霸禽斬七百餘。時川賊相繼復窺漢。十一月長麟赴南鄭。褒沔以防上游。慶成屯西鄉以防下游。而冉天士樊人傑衆二三千復奔石泉江岸。慶

成截其半濟。已先渡江。千騎出五郎華陽東奔。額勒登保卽率楊遇春回濟漢。北邀其赴商雒之路。慶成亦伏兵石泉江岸。擊破高馬等賊。時冉學勝伍懷志殘賊各僅二三百。適樊冉二賊至。復合隊裹脅數千。楊遇春穆克登布突擊于洵陽壩。禽斬六百餘。賊奔江口。留樊賊綴官兵。而冉學勝步騎二千先趨商雒間道。楊遇春等敗步賊于龍駒寨。復邀其騎賊于武關荆子關。與綸布春汪啟軍三路截擊。賊始不敢東竄。額勒登保與諸軍分路追偏。而西冉學勝奔漢陰。樊冉等奔石泉洋縣。適高天得馬學禮王廷詔賊數千復由安康渡漢。猝遇大

軍于漢陰。卽東走。額勒登保先遣千騎嘗之。賊果盡銳圍攻官軍。追及禽斬六百。復數路邀賊。五郎坪薄暮偏賊上高山之巔。賊插石如雨。官兵以賊偏絕地。露宿圍守。將俟旦一鼓殲之。賊夜縋山後絕壁竄。連日追殺二千。脅從解散殆盡。其楊遇春所追石泉各賊。樊人傑由褒城竄棧西。冉學勝奔華陽。遇伏敗竄。而高天升亦自楚回竄漢北山內。六年正月。德楞泰馳赴經略軍。議饒賊皆聚漢北宜兩路。會剿而後移軍漢南。以清川陝交界。乃議德楞泰邀擊高天升。而額勒登保剿高馬王廷詔于漢陰。時高馬等在南山之西。冉學勝在南山之東。

楊遇春追冉賊由二郎壩入南山。乘夜突擊高馬賊隊。潰斬六百。賊奔棧道。將西擾秦隴舊路。留後隊綴楊遇春。而急奔徽鳳棧道。冉學勝繼之。由是南山賊皆竄棧西。其留山內者。惟伍懷志一賊。額勒登保乃檄長麟楊遇春追賊隴西。而自督穆克登布留剿伍賊。初四川之賊冉天士龍。紹周唐大信。自六月爲陝兵所挫。截回太平羣賊。先後走川東。德楞泰約勒保由川北至東鄉。會剿適七十五。敗劉朝選湯思蛟。度向瑤于新寧。復移軍攻樊苟鮮三賊于大竹。德楞泰勒保大軍亦至。三路會攻賊。以川東北團寨嚴難虜掠。復窺嘉陵江。七月德楞

秦遣七十五李紹祖東邀樊人傑于隣水而大軍追賊  
墊江衝賊爲二乃留勒保搜捕而自追其前隊冒暑馳  
百七十里斬賊千有三百生禽及投出二千有三百又  
敗賊于岳池之蕭家場生禽數千付勒保後營訊之降  
賊與外賊夜通大譟德楞泰急分兵回救乃敗走時川  
東北寨勇爭殺賊脅從逃散絡繹建昌道劉清及通判  
劉星渠先後招撫二萬餘有 詔嘉獎鮮大川攻儀  
隴之天旗寨爲寨勇所殲而張子聰湯思蛟頗悔罪思  
降屯東鄉之前河久未焚掠勒保遣人招撫賊黨譚先  
後被殺有 詔切責八月七十五敗樊人傑于隣水

大竹殺賊千計追至開縣遇廣湯劉等賊四千擊  
斬九百餘賽冲阿邀賊于通江川擊其半渡禽斬千餘  
餘千賊奔東鄉後河德楞泰與勒保賽冲阿三路截擊  
殲廣向瑤賊全隊于崖澗其西鄉賊龍苟唐張等窺白  
水洞兵糧唐大信爲寨勇所殺九月德楞泰勒保追湯  
劉張等于東鄉後河各僅餘數百復截徐天德之黨趙  
麻華千餘賊于大寧老林川東肅清乃議勒保軍雲開  
間迎擊自楚折回之賊而德楞泰移軍川北以剿自陝  
折回通巴之賊與經略夾攻十月通江賊顏勝可楊開

第等望風遁回西鄉而巴州賊辛聰張世龍復爲劉清遣鄉勇冒入其隊潰斬數百七十五亦敗之南江賊始不敢窺嘉陵江德楞泰留七十五防川北而自赴勒保軍會剿十一月樊徐冉張等賊爲官兵擊敗于太平皆由城口奔陝城口據萬山中爲太平紫陽平利大寧各賊逋逃藪德楞泰遣總兵託雲泰以兵勇三千扼之而自繞赴川北與七十五合擊廣元蒼溪之賊賊聞大軍至合隊五六千東竄勒保率阿哈保等邀之渠縣先截其探騎百餘而突衝其大隊禽斬二千賊奔儀隴德楞泰辱食馳擊衝賊隊爲三圍斬千餘斃賊首楊開第齊

國謨等惟李炳陳朝觀顏勝可魏學盛千餘賊潰遁巴閬十二月德楞泰追賊閬中勒保追賊巴州賊合竄廣元寧羗與七十五所擊敗之辛聰賊二千及陝督長麟所擊回之張世龍阮正潮等賊三四千合竄川陝交界等內乃議勒保回川東迎擊大寧之賊七十五專剿川北老林之賊而德楞泰追賊入山移軍赴陝其湖北之賊自六月總督姜晟赴軍明亮與總兵孫清元德昌三路剿徐天德于均房賊已渡陟河西犯鄖竹竄入陝留後隊擾均州穀城

詔副都統長齡以領隊大臣率吉林黑龍江兵千有五百赴湖北軍七月明亮等邀徐



天德于南漳殺賊千餘而川東徐萬富苟文明等賊三千復東犯房縣李紹祖追擊入楚八月與明亮孫清元夾擊殺賊千餘賊夜渡陡河之黃龍灘由鄖縣竄陝復追敗于平利之汝河餘賊僅七八百明亮以有慶溥等兵迎剿卽回軍房縣禦川東入楚各賊有詔切責時樊冉張王等賊三路赴楚每路二千餘李紹祖敗死遠安倭什布馳援之九月明亮孫清元擊賊房縣之上龕斬賊千賊日夜西南奔欲引官軍入山而乘間竄東北官軍兩路截之偪回大寧明亮馳回二竹以防平利東竄之賊詔以明亮前此驅賊入陝今復驅賊入

川皆出境卽塞責降爲藍翎侍衛不許奏事以長齡代明亮統湖北軍又以協辦大學士書麟代姜晟督湖廣十月長齡率索倫千餘騎及粵兵千迎剿高馬二賊于洵陽復邀之白河賊分數十隊徧據險要欲使勁騎無所施且面面可繞出我後長齡使兵據山爲四營而遣鄉勇誘之賊下山突陣數次不動乃潛遣騎繞出賊後夾攻大潰之先後斬賊二千殞厓死無數賊南向竹山欲由陡河走房保我輕騎晝夜兼程七路馳擊禽斬千有四百散脅從千計適明亮倭什布迎擊于保豐復禽斬八百賊走還遇騎軍不敢復戰卽踰山遁弃騾馬器

械西奔洵陽白河與平利賊合長齡明亮亦兩軍合攻十一月高天得馬學禮西竄留後隊高天升千餘賊于竹谿晝伏夜出四山縱火以疑官兵欲乘間東竄孫清元長齡明亮遏之賊不復焚掠晝夜疾馳由興山直奔荆宜官軍遶出遠安邀擊而徐天德王廷詔等復爲經略大兵偏竄竹谿長齡明亮孫清元三路迎擊于房縣圍斬六百餘賊不復東竄十二月高天升樊人傑徐天德三賊合隊萬餘屯竹谿將分赴川陝孫清元扼其西南明亮長齡邀其東北合攻于太平關斬賊千計脅從逃散無數徐賊奔西南山內孫清元剿之高樊二賊奔

平利而高賊遂出洵陽官兵給舟渡漢北六年正月德楞泰與經略會籌漢北分擊高天升于山陽殺賊千有八百釋其脅從千遣賽沖阿躡餘賊而自選輕騎冒雪繞出鎮安之北與賽沖阿夾擊禽斬大半殲賊首高天升詔以德楞泰迅掃巨憝與前此肅清川西同功晉封一等子爵德楞泰復回軍漢南是月上以官兵勞苦五載特遣大理寺少卿窩星額太僕寺少卿裘行簡賚銀十萬兩馳驛赴陝宣犒經略參贊兩軍并荷包帶鉤搬指翎管等分頒將士又詔懸賞格以購徐天德王廷詔樊人傑三教首及高天升高天得馬

學禮屢害大員之賊其餘龍冉張苟等許降免死其禽  
斬者賞次之六年二月南山賊伍懷志復糾衆三千由  
五郎東奔額勒登保遣穆克登布追之冉學勝糾高賊  
餘黨千餘西竄棧道渡渭而北長麟邀之隴州賊復渡  
渭南而渭北又有汧陽新起之賊遣副將蕭福祿剿之  
斃賊千餘生禽千有二百隕崖死者三百餘時山上多  
脅從難民蕭福祿不宣諭招宥卽圍攻蹙之 詔盡  
釋所俘千餘降蕭福祿參將時渭北久旱 詔至卽  
雨而長麟所追冉賊復由唐藏黑河將赴沔略 上  
責額勒登保困于南山零匪乃奏伍冉二賊責成穆克

登布長麟兩路而自以兵三千渡西鄉與慶成迎擊高  
馬等賊時高馬等爲楊遇春所追犯隴不遂折而向川  
楊遇春繞出沔縣黃和驛長麟赴雞頭關各伏兵以待  
賊全出溝口突起掩殺禽斬二千賊僅數百亡命入川  
楊遇春留軍休息而自選精騎并沿途抽各營兵勇追  
入川之賊一晝夜馳四百里賊不暇復虜掠又川中團  
寨嚴乃折回兩河口楊遇春由南鄭西鄉追賊回陝與  
慶成會擊禽斬三百生俘王廷詔搜獲畫像經卷檻送  
京師惟高馬二賊遁巴山其後隊留南山者亦爲  
長齡邀擊禽斬大半三月高馬二賊與川賊陳魏顏辛

聖武記 卷一  
等竄西鄉窺江岸額勒登保遣慶成札克塔爾兩路迎擊先後禽斬千餘楊遇春旋禽高馬二賊于大寧之二郎壩俘斬殆盡 詔晉額勒登保二等子楊遇春襲騎都尉乃檄遇春赴城固洋縣擊冉賊時冉學勝自長麟赴汧陽後敗楊奎軍于留壩陣亡總兵副都統以下數百連日虜脅衆三千騾馬二千餘復鴟張甚額勒登保率慶成分路趨棧道賊已由秦州渡渭大軍追及隴州與長麟會剿遏其赴固原之路賊始東竄四月額勒登保使長麟西北追躡而自率大兵遶出寶雞賊不敢東北復渡渭南奔棧東晝夜疾馳欲竄楚豫大兵循南

山之南過其入山令慶成扼其東而賊已渡漢南乃選精騎渡漢夜襲其營潛斬三百餘散出難民七百餘賊沿江東下復思北渡遂沿江兵勇所遏遂竄巴山五月額勒登保敗諸安康賊復與張天倫曾芝秀陳國奉等合屯高唐嶺衆五六千楊遇春數路趨之禽斬三千賊復分爲二楊遇春與副將楊芳等夜突襲張天倫于白河禽斬殆盡乃留札古塔爾剿張天倫而自與楊芳邀冉賊于平利其漢北之伍懷志賊爲穆克登布屢禽斬僅存千餘時南山內堡寨已密所至截殺穆克登布晝夜追捕賊僅存三百匿秦嶺老林穆克登布分兵一傍

秦嶺西南麓進一傍東北麓進一裹乾糧由秦嶺之巔  
躡追皆居民樵采不到之地賊急復由孝義老林出五  
郎沿途餓斃所存愈少而降賊李其貴復招出黨賊二  
百餘卒獲伍懷志于層崖之上于是漢北復無賊額勒  
登保奏以慶溥赴廣元防漢上游喜明柯藩等屯平利  
安康防漢下游與慶成西鄉軍犄角其四川之賊自正  
月德楞泰與勒保分軍後七十五擊敗川北各賊于通  
江斬張世龍而樊人傑徐萬富冉天士王士虎等衆四  
千爲長麟軍遏其入棧復南奔廣元寧羌劫餉械冒官  
兵欲奪渡嘉陵江爲兵勇所拒轉趨儀隴下游適勒保

率阿哈保等迎擊禽賊二千餘斬徐萬富阿哈保  
復馳通江扼其入陝與劉清七十五合擊殲禽二  
千餘賊奔川東將與劉湯辛顏魏陳李等八九千  
賊合阿哈保薛大烈等追及之樊人傑跳崖遁餘  
賊不敢赴川東散竄老林由通江竹峪關奔陝勒  
保檄七十五夾攻川東賊于巫山忽左右山溝突  
出賊三千麀戰都司羅思舉潰其右隊之賊左隊  
亦走追斬六百餘散出難民千餘獲器械牛馬千  
計餘賊奔東鄉太平時辛聰衆二三千屯太平湯

思蛟糾各路敗匪五六千屯大寧三月勒保以查勘嘉陵江爲名回軍川北 詔切責革職留任

四月勒保破賊巢五月與七十五兩路偪攻賊竄陝楚阿哈保追入楚七十五追入陝而勒保別剿大寧鹽場之賊阿哈保敗龍紹周之分隊唐明萬李顯必于竹山三岔河于界嶺東溪河斬李顯必殲溺殆盡時大雨五晝夜官兵阻溪漲不能渡糧盡多餓死者七十五追冉天士千平利之大渝河先遣卒間道據其後山偪賊出隘而伏起衝之賊

爭攀崖遁禽斬二千勒保令七十五追剿入楚而與阿哈保回軍界嶺與經略及長麟明亮等議攻川陝楚交界各賊其德楞泰自二月與經略分軍後漢南賊苟文明已竄湖北龍紹周亦糾合唐張冉李各賊萬餘東走會慶溥扼白土關乃南趨鎮坪爲川陝楚通衢德楞泰分兵勇八百聲言追躡而自由雞心嶺繞赴二郎壩待之賊前營步騎四千中營五千已進和岡溪後營三千方攻天平寨

見軍至卽遁而伏于賊以截我後乃遣賽沖阿追剿後營遣溫春扼和岡溪口以截伏賊而督兵進攻中營賊于峽內賊無走路其脅從爭弃刃矛四散前營賊冒死回救賽沖阿等領勁騎內外夾攻斬戮千有八百生禽二千餘墜溺逃散二千餘餘賊數千東竄詔以參贊威聲素著賊望風爭避聞前在四川與勒保軍互易旗幟賊易而趨之大爲德楞泰軍所破曷仍用前計佯爲他將之兵以懈賊所

謂兵不厭詐也三月龍紹周分遣唐明萬千賊奔太平老林欲引官兵西追而自率大隊突入楚德楞泰邀擊于竹山之官渡河騎賊數百先涉餘賊數千雜沓河岸黑夜聞追兵鎗礮聲爭赴水漂溺大半時我兵至者僅數百故濟岸之賊及沿河東竄之賊尙三千餘竄回太平書麟明亮長齡等皆馳赴參贊軍會議初湖北賊自正月高天升入陝後惟徐天德留楚長齡明亮回軍與孫清元夾攻賊西奔鄖竹將合陝賊書麟孫清元扼吉陽關斷其交結長齡明亮擊苟文明李彬于竹山轉戰一晝夜禽斬及逃散各千賊折赴川東二月明亮等

軍夾擊徐賊于保康殺賊八百餘使孫清元扼霧露河杜賊東竄是月 詔議移湖北巡撫于襄陽控制鄖

宜書麟等奏請增設湖北提督于襄陽而移襄陽鎮總兵于鄖陽鄖陽協副將于竹山巡撫仍治武昌三月官軍數路剿徐苟等賊于興房間先後殺賊千有三百殲賊首張允壽允壽徐賊謀主猶張漢潮之有冉學勝也時德楞泰所追龍紹周已入川乃使明亮北扼二竹而白繞出興山之東與長齡夾攻時賊所竄長房河西北老箐荒僻淤阻二百餘里無人迹德楞泰使竹山鄉勇執參贊旗幟入山躡追而大兵由松露河繞出其前會

徐賊已出山北遁而苟賊尚未出山乃以長齡一軍伏山口邀擊而德楞泰軍追徐賊擊諸山峽禽斬千有八百餘賊三千奔上龕復為明亮所破賊盡竄川楚交界

詔還德楞泰雙眼孔雀翎時書麟卒于房縣以吳熊光代之先令長齡暫署總督事而巡撫倭什布以軍餉不給為經略參贊劾罷以全保巡撫湖北時川陝荒歉賊艱掠食皆欲東走湖北四月徐天德與樊人傑王國賢陳朝觀曾芝秀等賊合隊而東德楞泰邀之禽斬千有八百陳朝觀為寨勇所獲楚賊略盡德楞泰奏言臣自用兵以來三次肅清楚境而邊界綿長與其布兵



各卡力單難堵禦不如分兩路游兵長齡率孫清元領兵六千于房縣專備川賊明亮以兵六千于二竹專備陝賊與兩省追兵夾擊以剿爲堵時西竄各賊分路狂奔留後隊于峪河口綴官兵而前隊奪渡漢北將山鄖西赴河南德楞泰追及洵河扼其東北禽斬千餘賊西南奔鎮安劉之仁雒昂等扼其入山慶成復迎擊于兩河口沿途各寨截擊脅從乘勢逃散遂復折渡漢南慶成過江與德楞泰夾擊賊僅千餘南奔川境時陝賊留楚者惟王國賢張萬林戴仕傑三千餘由鄖陽走房保長齡孫清元禽斬其半五月德楞泰追徐天德于兩河

口覆其府徐天德溺死其餘黨留漢北者由洵陽奪舟渡江亦爲卹縣嚴如煜鄉勇所覆并獲張天倫于是龍苟二賊竄不利王國賢戴仕傑曾芝秀等在洵陽竹山辛聰冉學勝等向白土關羣賊皆聚川陝楚邊界經略參贊將合三省兵聚而殲之

詔以明亮老病解軍事來京又

詔各路

征兵馳驅五載其傷病未愈及家無次丁者量遣歸營別簡精銳以作士氣此嘉慶六年夏以前德楞泰與陝楚軍分合情形及羣賊徧歸三省交界

之事其堡寨利害見于湖北者長麟奏言湖北用兵剿寇五載而寇終未靖蓋由賊逸兵勞制扼未得其要教匪本流賊遇食便食遇屋便舍但持一械即可橫行非官兵必需鍋帳糧運之比敗則四竄林箐夜則舉火嘯聚多方誤我不能兼顧兵甫集而賊已遠颺兵甫撤而賊又踵至以累重之兵剿輕便之賊是以曠日無效且湖北邊界與川陝大牙相錯二千七百餘里出川陝卽入楚出楚卽入川陝層巒疊嶂四路可通若欲無處

不防兵少則寇視之蔑如兵多則以有用之師坐困于無用之地伏思設兵原以衛民與其孤懸戍守于荒山絕澗中糧運險遠瘴厲不時使賊竄擾腹地而鞭長莫及莫若酌抽山卡兵勇撥歸衝要隘口厚集其勢探有賊蹤發兵馳往所至有兵夾擊旣無日日拔營之勞自有節節策應之效且賊雖東奔西竄不走平原欲疲我兵力而其蓄意全在平地掠食虜民但當併力守我有糧有民之區偏賊歸入無食無人之地黨孤食盡自然竄出以逸兵待困賊不難一舉撲滅湖北如鄖陽之鄖房二竹宜昌之巴東此五縣接壤川陝屏蔽內地形勢

最重鄖縣以鮑家店爲要隘房縣以化龍堰爲要隘竹山以保豐爲要隘竹谿以峰溪爲要隘房竹交界以官渡爲要隘巴水以西灤河爲要隘擬于六處各置步兵二千共需兵萬有二千其鄖西一縣與河南兵協堵至內郡荆襄均宜地皆平行必仿鄖竹築堡團勇之法賊卽深入數百里間層層俱有堡寨堅守無人可虜無食可掠且能堵截奔突與官軍犄角則有鄖陽邊界各邑設險環衛于外又有近邊各州縣築堡守禦于內賊不日可滅其見于陝西者巡撫台布奏言堅壁清野之策雖已奉行但村落大小不齊人戶貧富不等必須官爲

倡道臣自與那彥成倡捐勸諭以來計藍田鄠鄠寶雞商州鎮安商南雒南孝義五郎等廳州縣共築寨堡五百四十一處其間民修者五之四官助者五之一老弱財物盡移寨中惟是大寨僅能自衛小寨尙難固守且堡寨高踞山顛不能下山汲水貿易耕作間或猝遭虜脅而小民恐賊破寨間有擲給米糧情非得已難遽治以濟匪之罪此亦百密之一疎迥非從前任賊焚掠之比至漢中二棧爲軍餉要道自以擇地築堡存貯糧稍爲上策因于寶雞鳳縣留壩褒城寧羌各驛親爲相度先築江口一處教以取土壘石因利乘便之方堡周

三里牆高二丈廣丈有二尺崇墉屹然軍糧山積居民爭徙占地營屋其餘九處經費相仿總不出五千兩其渭河西北亦經督臣長麟勸諭辦理又陝撫陸有仁奏言築堡團勇之事川陝情形不同四川地居天險如大成寨大團包方山坪等寨每處可數萬人其小者亦數千人賊據之則可抗官兵而百姓守之亦可拒賊若南山內層巒疊嶂并無寬敞環抱之所止能于陡險山巔就勢結構每寨止容數百人至千餘人不等蜀山多膏腴稻田民居稠密其勢易合陝西老林惟棚民流寓零散墾種隔十餘里數十里始有居民十數戶若糾合數

村共築一堡則南村之人欲近南修築北村之人欲近北修築惟秦隴以西人皆土著無不踴躍興工秋間賊入棧西每以彼此各不相犯婉求各寨而寨民必乘間截其尾隊奪其牲畜不使晏然空過其西安同州鳳翔三府與漢南附近川省之區皆多土著審利害每邑結有堡寨或百餘或數百其漢北山內近亦一律興工又恐結寨後民丁但知守寨而于賊出入要隘轉無堵禦復令于堡寨之外每寨撥數百數十人合力守卡以杜窺伺請將五郎孝義藍田盩厔鄠縣五處責成臬司商州鎮安山陽雒南商南五處責成潼商道平利安康白

河洵陽紫陽五處責成候補道石泉漢陰城固洋縣南  
鄭西鄉五處責成延榆綏道鳳縣留壩褒城沔縣寧羌  
略陽六處責成陝安道刻期完竣是時陝甘修寨團練  
日密賊勢日蹙陝督長麟以團練有益于今日大有害  
于將來民氣日趨強悍或聚眾械鬪抗官拒捕不可不  
防其漸請乘此時令委員借散硝丸監操演為名稽查  
礮銃刀矛實數逮賊氛一靖無難按籍而稽 詔以  
安民必在擇吏誠得良吏自可鑄劍戟為農器否則斬  
木揭竿豈條例所能禁止况山谷居民捕鳥獸備虎狼  
不可無兵其擇良吏善行之以收銷兵實效其後凱旋

鄉勇由官給價購收鎗子果盡繳無事云

嘉慶川湖陝靖寇記七

六年六月額勒登保奏言川陝各賊除冉龍戴苟湯劉等尚自成隊其餘辛聰王國賢張天倫及樊徐餘匪大率皆官兵剿敗之餘延喘山林有此隊入彼隊者有數隊合爲一隊者無定名亦無定數目前陝中已無大隊之賊皆竄匿萬山老林寨堡較少之地陝剿急則入川楚楚剿急則入川陝由賊中掌櫃元帥外尚有總兵先鋒等目一經剿散則其總兵先鋒又各自爲首而首逆轉莫測所向卽殲斃首逆而去一人復立一人并非賊黨外有所增益至其黨與人數往往彼賊附入此賊則

聖正言  
此賊之數驟增被剿潰散則數又驟減合計不過二萬  
四千餘人此時堡寨完固卽有耕耘貿易猝被虜掠之  
人皆能乘間逃出不爲賊用而各路兵勇十倍于賊屢  
次斬獲自必有減無增業已偏賊入川爲一舉掃蕩之  
計是月經略參贊會議于平利德楞泰由西南偏攻而  
額勒登保由東北邀擊會剿于三省之交適龍戴等賊  
復分二隊額勒登保追戴仕傑等入陝而德楞泰七十  
五追龍紹周入川七月德楞泰邀賊太平開縣老林先  
後殲賊二千又遣降賊回營招撫散出脅從二千又寨  
勇沿途截殺僅存千賊八月復追諸大寧山內殲其七

百僅餘數百賊東走巫山而官兵暑雨崎嶇山箐病留  
各寨者亦千計乃休兵大寧搜捕近邊而令賽冲阿等  
追賊斬龍紹周于平利盡殲其衆時賊數愈少奔愈捷  
每望兵卽逃德楞泰乃分選兵勇每二百爲隊冒教匪  
服色旗號以降賊爲鄉導或佯與合隊或乘夜襲營各  
給護牌爲驗且密諭民寨無論兵賊皆不許入堡但協  
力截擊賊勢日蹙乃使薛大烈等分追湯思蛟劉朝選  
于太平而馳會額勒登保勒保于通江額勒登保自七  
月追戴仕傑由安康至太平適楊遇春追冉賊由大小  
巴山老林至大寧其冉賊分隊張天倫曾芝秀等亦踰

界嶺入川。額勒登保以川陝楚各賊皆聚川境，乃令慶成、喜明等嚴防漢江南岸，而與楊遇春分路入川。楊遇春殲禽冉天士、王士虎于簡池壩。八月，額勒登保遣楊芳等擊張楊二千賊于西鄉，遣穆克登布擊戴仕傑後隊于平利，皆俘斬千計。各賊僅數百竄老林，而通江賊李彬衆三千與慶成、楊遇春所追高見奇、魏學盛、辛斗等賊及楊芳等所追太平開縣之賊均至南江。東西分遁。額勒登保令慶成搜賊南江老林中，令楊芳等殲東奔之辛斗于通江，而自率楊遇春追西竄之高魏等于廣元。十月，川北各賊均思西竄，穆克登布遣兵迎擊高

見奇于紫陽，禽斬殆盡。額勒登保督楊遇春剿魏李等賊于廣元蒼溪，賊狂奔巴州，敗田朝貴之兵。官兵間道邀擊達州，禽斬千餘。賊分竄，一冉天璜七百賊奔東鄉太平，楊芳等殲之。一李彬數百賊遁西鄉，將與樊苟、辛聰合。楊遇春殲之。其勒保一路自六月督阿哈保等殲鮮苟等千賊于東鄉，託雲泰亦敗太平賊于城口。會參贊兵追賊回川東。乃詔勒保專辦川北。七月，陝賊高見奇竄川北，由閬中蒼溪昭化，屢窺嘉陵江，不遂。遂與魏學盛賊千餘合竄棧道。官軍邀之白丈關，禽斬七百。賊復合冉學勝于南江，勒保、蕭福祿等三路合攻，禽斬



九百餘生禽冉學勝

詔封勒保三等男阿哈保等

賞賚有差八月遣兵追高見奇于西鄉而自剿魏學盛于南江老林先後禽斬五百適通江賊李彬糾各路敗匪二千復至巴州乃移兵遏其赴嘉陵江之路其七十五所追湯劉等賊禽斬千餘僅數百賊走東鄉復與苟文明合衆二千將竄陝八月七十五擊苟賊于大寧斬其半俘其家屬而湯劉殘賊復乘間奔大竹勒保馳防江岸二賊旬日已脅衆四千餘騎千餘分擾墊江鄰水乃令田朝貴趨隣水阿哈保趨墊江而勒保山大竹三路偏賊復歸一隊追擊于達州禽斬五百散其脅從二

千賊復走還太平竄西鄉薛大烈追敗之截回川境十月慶成殲張天倫千餘賊于廣元復遣兵助慶溥遏高見奇西竄黑河之路餘賊數十遁老林穆克登布亦屢殲平利安康之賊敗匪輒回川而湖北之賊自六月內全保長齡孫清元等與七十五三路截擊湯劉辛張邀其竄東湖保康之路賊西竄入川而七十五所擊之龍戴二賊長齡孫清元全保會剿之曾辛等賊皆先後分竄川陝于是楚境復無賊十月詔以經略參贊奏報賊數惟湯劉李苟樊戴六賊尙稱大隊每隊不過千餘均偏入四川界內并其餘竄匿陝楚無名之賊統

計不過一萬有奇而經略在川北參贊在川東勒保界  
在中間限期今冬掃蕩額勒登保奏言剿大賊易為功  
剿小賊難為效目前除各老賊數隊外其餘孽散逃深  
山老林間雖總計尚可盈千而分竄皆不滿百不值以  
七八萬官兵搜捕應俟各大賊已除先酌徹回滿漢官  
兵各盡本省兵力今本省提鎮分地搜除其堡寨鄉勇  
則分派道府率同州縣或以數十寨聯為一處而臣于  
各邊適中督辦兵力所不到則以民力佐之民力所不  
及則以兵力佐之剿撫兼施以期殄盡 詔以經略  
調度有方將川陝十餘萬賊掃除殆盡僅存十分之一

首先施懋賞晉封三等伯德楞泰功在川西屢殲渠魁  
晉封二等伯穆克登布賽沖阿溫春均賞騎都尉世職  
其軍機大臣慶桂董誥戴衢亨交部議敘十一月  
詔曰川陝楚軍務將竣其善後事宜莫若扼形勢為控  
制近日湖北襄陽已增提督陝西五郎已增總兵固原  
提督亦議移漢中至湖北竹谿距四川之大寧陝西西  
鄉距四川之太平東鄉各七八百里或千餘里地廣兵  
希向為奸宄出沒之所如有今昔異形必應增改之處  
會籌以間其三省可墾荒地及銅務鹽務有便于民無  
害于官者量為措置額勒登保奏以太平界川東北之

中請設太平協副將而移舊都司于城口其廣元之黃楊堡通江之竹峪關大寧之徐家壩巫山之大昌皆踞萬山中應各設守備其達州改爲綏定府太平縣改直隸廳同知其東鄉之南壩地當通衢涪州之鶴游坪武縣之大印山皆周數百里居民數萬戶應設州同主簿各一又乾隆中移綿州治于羅江去年賊渡嘉陵江居民連夜修築舊城賊至無患應移綿州復舊治是月額勒登保德楞泰勒保會于通江經略參贊卽移軍川北而勒保赴川東時川東各路敗賊竄老林者冰雪凍餒分出掠食百十爲羣或有賊首或無賊首諸將各有斬

獲惟川北賊苟文明糾合高冉姚餘匪衆尙二千餘驟馬數百晝夜西奔七十五以兵疲就餉太平六日賊已渡嘉陵江上游之略陽河直赴階州慶成七十五先後馳擊額勒登保復令楊遇春兼程赴之并檄嚴守白水江扼其赴川西之路賊復折奔東南時德楞泰方敗苟賊分隊張天倫于蒼溪禽斬大半令田朝貴追之南江而自迎擊苟賊于廣元賊已虜脅三千餘十二月德楞泰敗賊通江斬獲千餘盡獲其騾馬斃苟文舉苟朝獻額勒登保扼竹峪關遏其北竄賊奔開縣大寧老林李彬餘匪亦歸之德楞泰兼程邀其入楚七年正月德楞

聖武記 卷一  
秦三路追苟賊于開縣生禽七百餘僅千賊奔老林山  
深雪厚民皆入寨數百里無人烟賊盡宰騾馬爲乾糧  
縊死林中者數十額勒登保馳赴西鄉過其北竄德楞  
泰使薛大烈追苟賊與經略軍夾擊而自回剿川楚交  
界餘賊額勒登保邀苟賊于紫陽賊竄西鄉官兵一日  
馳二百里追之賊已改趨白沔峽夜渡漢北官軍僅追  
殲其後隊二百 詔以額勒登保徹防江兵勇移于  
川陝邊界及是復追賊落後致渡漢北竄南山奪其伯  
爵降爲一等男并褫雙眼孔雀翎賊晝夜西奔與續渡  
江之宋應伏數百賊合隊敗副將韓自昌之兵額勒登

保薛大烈兩路追之楊遇春追辛聰賊黨劉永受亦自  
秦嶺驅偏而西三路會剿 詔德楞泰以參贊爲成  
都將軍專搜川楚餘賊額勒登保以經略爲西安將軍  
專搜陝西餘賊二月額勒登保令薛大烈搜老林自北  
而南偏賊出山而伏兵光頭山以待賊探知東南有兵  
復折竄太白河老林乃令薛大烈回川蕭福祿回漢南  
而檄楊遇春移剿苟逆時南山中賊劉永受爲楊遇春  
斬馘僅存百人而宋應伏三百賊亦與苟賊分隊西竄  
棧道三月三賊聞楊芳慶溥兩軍扼其西復自華陽合  
而東竄官兵數路追截復踰秦嶺北遁時賊久困老林

每思出掠糧。畏官兵四面截捕。每屯高山巔遙望。軍至卽遁。札克塔爾等以圍堵非計。乃佯撤辛口峪之兵。以誘之。驍賊數百果出掠。伏兵禽斬數十。復遁入山。賊遂全隊晝夜南竄。官兵扼其東西北三面。驅偏而南。及鎮安界。官兵會擊。禽斬三百餘。復竄而北。爲官兵所扼。乃竄上山巔。無路之處。蟻旋北遁。四月。詔曰。額勒登保自用兵以來。從未有老師若此者。捕賊如捕鼠。當熏出穴而捕之。今困賊山內。仍不能絕其糧。賊屢欲竄棧西。何不縱令出山西竄。而我以十餘倍之兵蹙之于平野。額勒登保奏言。賊皆徒步。知四面皆兵。一出平原。必

爲勁騎所蹙。始終不敢離老林。屢爲官兵驅偏出山。旋復竄入。五月。上切責額勒登保。札克塔爾曠日持久。無方略。均革職留任。又諭額勒登保徧訪將士。獻禽渠之計。並懸重賞購募。如前購徐王高馬之例。限六月內滅賊。六月俘苟賊妻子餘賊三百人。由孝義竄秦嶺。楊遇春知老林無食。設伏要隘以待。賊果西竄。途虜居民知有伏。復折竄老林。額勒登保奏請展限一月。七月。苟賊復分三百賊爲三路。遇林徑錯雜。或徧踐足迹。或亂擲衣物。以疑官兵。官兵以獲賊爲嚮導。斬其先鋒王世貴。賊復分百人爲數路。散竄老林。我兵皆欲禽

賊邀賞亦百十爲隊。冒雨潦深入絕壑窮崖無所不至。先後搜獲十人十餘人不等。最後斬苟文明于花石巖時。上幸熱河。適捷奏至。詔還額勒登保三等

伯賞還雙眼孔雀翎。命移軍湖北與德楞泰會剿。

德楞泰自二月剿賊巴巫。令副都統豐紳以兵二千登舟東下。邀其東竄。盡驅巴巫各賊而西。勒保賽沖阿張績等三路迎擊新寧大竹間。禽斬大半。三月張長庚陳自得殘賊走夔州。爲七十五斬捕。惟宋國品張簡二黨尙出沒東開間。川東賊不及千。乃令豐紳赴川北助剿。張魏七十五屯川東。備陝楚邊界各賊。勒保督田朝貴

薛大烈張志林等分控東開雲萬太平而賽沖阿溫春。隨德楞泰赴楚時。湖北賊糾合數千。其老教樊人傑戴仕傑爲掌櫃。而曾芝秀王國賢崔宗和胡明遠四賊主戰。全保長齡遏其東竄。賊折犯二竹趨陝。遇穆克登布迎擊于平利。乃東趨東湖穀城。德楞泰使鄉勇數百多張幟。聲言大兵追躡。而自率將士輕騎倍道。邀賊東湖之霧露河。以千兵扼溝口。伏賊而督兵三路仰攻。雞公山禽斬七百餘。賊折回興山。沿途逃散。餘賊不及二千。而巴東賊蒲景等五千餘。圍參贊兵。追賊西行。卽分千賊綴孫清元軍。而大隊突渡霧露河。德楞泰乃使長齡

聖正言 卷一  
孫清元合剿樊曾餘匪而自追蒲景于房縣五月及之大埡口恐賊遠颺乃分兵扼其東南又多留帳幕以綴賊而夜繞百餘里出山後乘雨霧突襲其巢又追破之興山禽斬逃散僅千賊分竄適長齡孫清元所追樊戴等賊又分二路戴崔胡走東湖副將李天林剿之樊曾王由均州西竄德楞泰乃令副都統色爾滾總兵蒲尙佐以兵二千追蒲景等而自迎擊樊曾三賊于房竹界之官渡河時久雨山潦暴發官軍步騎相間拽尾亂流數十里追及于白鐵峽乘霧繞據山頂四面偏賊盡入峽內無走路前惟阻一河盛漲如雷樊人傑曾芝秀冒

死赴之急溜怒濤中無一免者其前過官渡河之王國賢賊數百亦爲穆克登布遣兵所破乃令孫清元德昌搜二竹之賊吉林泰李天林搜東湖歸巴之賊而自與長齡賽冲阿彩剿蒲天寶于興山 詔以德楞泰旬日連殄三寇晉封三等侯六月蒲景等糾各敗賊奪據興房交界之鮑家山周三四百里糧富寨峭守嚴德楞泰置大營東北以綴其前又令守隘鄉勇多張幟聲礮爲疑兵賊莫測所以忽一日黎明寨內殺聲四起天降地出走徑皆已自剗絕擠崖隕壑趾頂相接蓋色爾滾蒲尙佐以精兵千弼箐取道援藤縋壁繞出賊巢之上

聖正言 卷一  
矣。餘賊七八百，盡竄老林。乃分兵勇扼其入鮑家山及入陝之路，追搜大寧各箐，數晝夜禽斬殆盡。獲蒲天寶屍于崖樹，適額勒登保亦殲。苟逆于南山，于是陝楚兩劇賊皆平。其川北張魏二賊，自三月與田朝貴相持，廣南通巴間，屢挫官軍。及朱槐、蕭福祿、羅思舉等奉經略檄至，始東竄。官軍追殲之，開縣勒保乃令田朝貴、羅思舉扼竹峪關，擊自陝竄川之賊。四月，羅聲臯殲度向瑤于東鄉，張績殲徐天培于豐城，田朝貴殲李彬餘匪，楊步青于通江，豐紳劉清破張魏餘匪于廣元。于是川北無賊。其川東之湯劉、張子聰等餘匪數百，四竄山林，官

軍搜之，寨勇截之，無暇虜脅。所禽斬皆老教真賊，勒保乃率張志林東赴夔門，以防川楚邊界。五月，熊翠熊方青六七百賊掠巫山，劉朝選四百賊掠奉節。時各賊因楚兵剿急，先後竄川。勒保檄巫山大寧兩路分剿，羅思舉殲劉朝選，羅聲臯殲賴飛龍，晉封勒保一等男。其漢南之賊自川北竄入者，則委賊剿之。殲張魏餘匪于棧道，自川東湖北竄入者，則委賊剿之。并不時鵬剿太平大寧及二竹之賊。是時勒登保德楞奏言：本朝用兵，準回兩部大小金川，從無竄勇之事。自征臺灣苗疆，教匪皆剿內地，亂民與外番不同，必使良民自保。



不爲虜脅而後可孤賊勢且江寧城堵隘亦無如許  
官兵是以嘉慶元二年間四川應募鄉勇至三十餘萬  
其間流民不過十之一二皆以本地之人爲官兵哨探  
鄉導免爲賊用故全川得以保護自勒保再至川後賊  
勢日網先後裁汰僅存萬餘不及十分之一從未有因  
裁鄉勇激變之事目前統計川陝楚鄉勇不及二萬皆  
上著有業之民事竣必不願入營伍惟隨征鄉勇萬有  
七千多外省無業流民其有家可歸者十之二三願入  
伍者不下一萬近議湖北增兵三千五百陝西增兵六  
千四川增兵千共增兵萬餘請卽以安置無業鄉勇無

煩招募其願歸籍者善爲賫遣以卹義勇銷後患八月

詔以南山餘賊責總督惠齡提督楊遇春專剿時

長齡病回京命慶成代之以副都統格布舍代慶

成九月額勒登保赴竹谿與德楞泰吳熊光會議時德  
楞泰破熊方青千賊于大寧遣賽冲阿追入陝而自移  
剿戴崔胡六七百賊于房縣截擊逃散僅存百餘竄老  
林穆克登布復破王國賢餘匪于平利追入川詔  
德楞泰專搜楚賊額勒登保專搜陝賊十月德楞泰遣  
蒲尙佐富僧德殲戴仕傑于興山禽崔連樂崔宗和于  
房縣殲陳仕學于巴東乃分兵搜巴巫餘匪而自扼界

嶺策應時楚賊略盡其南山遺孽宋李陳斬二張等爲  
楊遇春楊芳分兵十餘路櫛比排搜亦所餘無幾惟入  
川之賊不下二千額勒登保乃令楊遇春移師寧河以  
防川北折陝之賊而自與穆克登布分道入川別留格  
布舍兵千餘聲稱經略大營屯鎮坪以防川楚餘匪時  
川北則羅思舉禽張簡湯思蛟于東鄉川東則豐紳桂  
涵殲羅半年李世品于梁山太平又張長青百餘賊乞  
降于雲陽其餘散匿山林不過各十餘及數十人已無  
百人之賊而楚賊樊曾餘匪齊國典衆千餘由大寧竄  
入梁萬又王國賢餘匪四百唐明萬三百亦先後竄川

勒保檄諸軍分路剿之羅思舉禽唐明萬穆克登布亦  
由西鄉迎剿入川會擊齊賊于通江禽斬逃散餘三百  
賊竄通南羅聲臯武隆阿殲之并禽景英 上大  
功將竣先復額勒登保三等侯時額勒登保屯西鄉太  
平邊界勒保屯東鄉開縣開德楞泰亦由巫山入川將  
三路偏賊歸開太大寧間聚而搜捕其南山餘匪苟朝  
九爲楊芳雒昂剿急與前竄寧羗之宋應伏二百賊合  
竄漢南官兵追之川陝楚首逆已盡惟殘匪千餘歸于  
善後事宜籌辦十二月經略參贊會同川督勒保陝督  
惠齡湖督吳熊光以大功戡定遵 旨不用紅旗用

黃表朱裏摺六百里馳奏

詔三省蕩平上終

先帝髦期未竟之志祭告

裕陵宣示中外晉封額

勒登保一等威勇侯德楞泰一等繼勇侯皆世襲罔替

並加太子太保

授

御前大臣

賞用紫韁

勒保一等伯明亮一等男賽沖阿楊遇春世襲一等輕

車都尉其親王軍機大臣戶兵二部及各省承辦軍需

之督撫司道

錫賚有差遣官祭告川陝河湖四省

山川神祇又

詔四川湖北陝西甘肅河南被賊各

州縣自元年至七年帶征緩征逋欠錢糧普予豁免與

百姓休息

嘉慶川湖陝靖寇記八

是時三省腹地雖靖山林邊界尙藪逋逃詔大病雖

愈瘡痍未復經略參贊其毋遽來京而諸帥亦鑒于明

季李自成爲陝兵剿敗僅餘十八騎亡命山中逾年復

糾衆出山大猖獗是一賊不盡皆足滋蔓于是額勒登

保屯西鄉扼川北賊竄陝之路德楞泰屯太平大寧扼

川東賊竄楚之路而勒保往來東鄉新寧堵南竄腹地

之賊其楊遇春所追漢南之宋應伏苟朝九復糾巴山

餘匪分隊入川八年春額勒登保使楊遇春迎擊楚匪

于博坪而自督羅聲臯等剿苟賊于通江使穆克登布

磯姚馨佐陳文海于南江姚馨佐姚之富之子也而南江復有宋賊出歿其黨馮天保余佐斌熊老八等皆百戰猾賊誘官兵入林搜捕而突出格殺穆克登布中矛死穆克登布與楊遇春俱爲經略左右翼長每戰輒冠然性急額勒登保又先期奪其麾下健兒改隸他將故是日無親兵捍衛而敗三月羅聲臯追賊東鄉太平額勒登保邀其東北賊復西竄兵進亦進兵止亦止官兵屢禽斬尙餘四百苟朝九詭死使靳思慶趙金友領其衆齊國典亦投之其田朝貴剿宋逆餘匪于開縣斬馮天保宗賴子皆戕穆克登布之賊惟熊老八余佐斌率

百餘賊遁太平東鄉老林復敗富僧德蒲尙佐之兵官弁死者十餘四月苟逆餘匪復分二隊齊斬百餘賊東走太平羅聲臯等追之趙金友三百餘賊北奔陝窺漢江額勒登保邀擊冒雨晝夜分路搜捕先後禽斬殆盡西鄉近川界數百里已無賊復集兵勇回搜開縣太平五月田朝貴羅聲臯等斬靳思慶于太平六月禽趙金友于大寧又參將陳弼報禽熊老八于太平傳首京師以祭穆克登布之墓其德楞秦川東一路自正月王國賢二百餘賊陳雲三百餘賊又龍熊賊黨劉學禮等糾零匪及散遣鄉勇七百先後竄巴東時慶成養傷襄陽

詔德楞泰赴湖北閏二月德楞泰襲攻劉賊于老鴉寨斷其走路蹙諸當陽河禽斬漂溺僅竄遁二百追殲之竹山三月陳雲與苟朝閣呂宗明合隊六百走房縣慶溥吉林泰剿之兼禽樊戴餘黨胡明遠于房縣其富僧德蒲尙佐所搜太平大寧之賊亦先後奔楚德楞泰乃自川東移剿四月張瑗李天林偪兩路賊入川其慶溥及吉林泰所追二隊禽斬逃散外各存百餘合計興巴之賊不過三百德楞泰乃奏將各路分捕之兵再分多路裹糧五日會哨排搜令其具結保無遺匪以巴東責吉林泰竹谿責慶溥房縣責李天林巫山責蒲尙

佐大寧責豐紳其豐溪平利各處責楊遇春

詔川

陝仿行之時川賊之就撫者賴應舉降于達縣廣元賊青藍黃號降于劉清王國賢黃國隆黃朝舉申三亨王相胡大年等先後降于雲陽

詔獎雲陽知縣梁敦

懷招撫之力又參將桂涵殲湯劉餘黨宋國品于大竹副將馬元殲唐大信黨百餘于開縣其漢江以北南山餘匪楊芳屢次捕斬僅三十餘賊乃分兵勇五路排搜自東而西自南而北或數日不見賊踪額勒登保奏言陝境已無賊惟楚賊僅二三百川賊山內山外亦各二三百皆散竄延喘其勢已成囁匪擬別籌變通之策六

月額勒登保與勒保會于開縣督諸將分二十餘路排  
搜老林而西先後復禽斬二百餘各寨勇亦沿途截殺  
德楞泰亦掃蕩川楚邊界移師入川七月額勒登保德  
楞泰勒保會奏三省肅清官兵凱旋

詔德楞泰先

入覲額勒登保留搜餘匪奏派三省官兵各按各境湖  
北分六哨慶成統之四川分六哨勒保統之陝西分八  
哨自西鄉至寧羌七百里將軍興肇統之自西鄉以東  
至安康千餘里楊遇春統之其各營之隨征鄉勇每人  
以銀五錢繳刀矛銀二兩資遣回籍皆驍桀亡命無家

可歸多勃鬱山澤間而太白山老林深奧爲官兵未搜  
之地亦匿百餘賊至是六月楊芳搜至其地匿匪突  
出蓋屋洋縣楊芳追之入山八月副將吳廷剛所散鄉  
勇百六十人遂入賊黨合隊三百苟文潤領其衆詭稱  
馬姓虜掠四出復猖獗九月楊遇春兵由洋縣入山額  
勒登保渡江督之賊東奔鄖陽不遂遂由石泉七星壩  
竄渡漢南赴西鄉復糾巴山老林餘匪及通江已散鄉  
勇衆五百戕副將朱槐于山溝

詔楊芳回漢北防

山內餘賊十月德楞泰出都

詔額勒登保還朝以  
餘匪付德楞泰搜捕時楊遇春邀安康平利他賊亦追

入川時賊皆百戰之餘。猿騰隼鷲具悉。官軍號令及老林徑路。忽陝忽川。忽聚忽散。屢被圍復。乘霧溜崖。突竄有。中數矢。猶力戰者。分軍遇之。則不利。大隊趨之。則免脫。僅餘二三百賊。而三省不得解嚴。十一月德楞泰剿賊山中。忽我前隊鄉勇旗幟不動。致陣亡副將以下數十。詢知賊中多舊充鄉勇。與我鄉勇相識。相訴。故臨陣觀望。會藍翎鄉勇魏中才等請赴賊營。招諭德楞泰遣之。竟為苟文潤所殺。詔懸賞購賊。如前購捕苟文明之例。九年正月賊屢由安康窺漢岸。欲竄南山。皆為楊芳兵勇所卻。其分隊王世貴百餘賊。亦由平利竄川。

賽冲阿追之。楊芳復屢禽山內餘匪百餘。于是南山無賊。惟嚴防漢江北岸。二月額勒登保復出都。以欽差大臣赴陝。德楞泰圍賊太平之百里荒。四面設卡層層進逼。賊屢乘霧突圍。不能出。復絕壁宵遁。三月合滄石河。匿匪五百。竄界嶺老林。諸軍會攻于竹谿。三月又追擊于平利。禽斬百有四十餘。賊三百奔化龍山。老林為從來各賊未涉之境。又時冒兵勇商民誘破小寨。掠糧東西無定。諸將士皆棄帳裹糧步追。而從征八載久役。思歸。四月額勒登保由興安渡江督師。乃先汰遣疲病兵勇。復下令凡士卒禽一賊者。即優遣回籍。分兵

五路人自爲戰并伏兵各寨以備攻寨掠食之賊賊奔  
太平大寧入川復增糾散遣鄉勇二百五月 上切  
責諸將老師持久降謫有差而暑雨時行山潦暴漲兵  
與賊皆不能進額勒登保德楞泰楊遇春皆病六月  
詔額勒登保回京以 欽差大臣關防交德楞泰

剿賊于川陝界之鳳皇寨禽斬百有六十尙餘二百賊  
楊遇春邀之平利復折回化龍山八月賊黨趙洪周聞  
購捕之令乘間斬苟文潤出降餘黨解散乃令楊遇春  
賽冲阿兩路入山搜捕而楊芳搜漢北豐紳馬瑜田朝  
貴三路分搜川境先後禽斬無虛日會寨勇禽苟朝九

于南鄭羅思舉禽王世貴于太平各路皆報肅清九月  
班師 詔德楞泰回成都將軍之任蓋自奏報戡定  
後以散遣鄉勇激變復勞師二載數百賊當數千萬賊  
剿數萬兵當數百兵用其肅清善後之難蓋如此時  
陝甘總督長麟奏善後事宜議收器械毀堡寨勒保奏  
言川民廬舍皆與田畝相連多散少聚自賊氛日熾民  
皆團築高險大寨以自守衛而別分小寨于平地以便  
耕作貿易皆迫不得已自戡定以來爭還平地故居并  
無戀據險阻之人不俟官爲散遣間有近田畝成村落  
者原可聽其安聚卽如東鄉太平各縣皆有前明古寨



聖政記 卷一  
卽昔人避流寇之所若慮其藏垢納汙悉勒除毀非特  
勢所難行亦可不必惟有設立寨首仿保甲之法約束  
民戶禁習邪教則守望可以相助于詰奸興教兩益自  
賊起事至再報戡定計先後用兵九載費帑銀幾二萬  
萬兩所奏殺賊數十萬計而官兵鄉勇之陣亡與五省  
民之罹毒者無得而稽焉

臣源曰以今準古方域陝西雍州四川益州而漢中興  
安則華陽黑水梁州之域自古別爲一道明代嘗置鄖  
陽巡撫以統治之界以漢沔夾以南山巴山襟帶背負  
據秦隴楚蜀之交旁薄二千餘里多材木竹箭五金百

穀流毗姦宄之所托命天下有事常先叛後服由四省  
犬牙相錯出此入彼且建官少距都會遠聲教所不暨  
控馭所不周也當軍興之際 天子蒿然議移巡撫

移提督屢下廷議或可或否愚以爲宜割四川陝甘湖  
北山內之地設置行省以巡撫兼提督建闡興安居中  
控制西枕漢中府而割寶雞秦州徽縣兩當以屬之東  
抵鄖陽府而割興山南漳巴東歸州以輔之東北屏商  
州雒南而割孝義寧陝二廳以屬之南屏綏定府而西  
南割寧羗南江通江東南割太寧等以屬之其表僻寥  
濶之區非徒增營汛且必增州縣使有城池解署學校

倉庫監獄無事得以編保甲司教養銷非僻于未萌一且偶有反仄蠢動專闢大吏朝發夕至朝撲夕滅責專權一庶鞭長而肘不掣蔓圖而原不燎秦隴楚蜀豫間不致常以腹心茹蠱虺庭闈豢封豕于古者邦國封域形格勢禁之誼尙或有取焉或曰王化之本在京師春秋之誼詳治內略治外故安民在乎知人而建置抑其標末也

嘉慶川湖陝鄉兵記

川陝之役剿內地亂民故多募鄉勇以佐官兵之不逮而鄉勇又有守有戰其守險保衛者若襄陽鄖西竹山竹谿龍駒寨已分見各記惟隨征之鄉勇則自文吏劉清外莫著于羅桂二將事多不見奏牘不可以無述羅思舉者嘉慶中以鄉勇殺賊四川起家至節鎮威名亞二楊思舉用兵善因險出奇以少破衆長劫營長用伏長用間其得名蓋自豐城劫寨始豐城者達州東鄉賊王三槐巢穴屯聚數萬矛槊成林官軍莫誰何適賊三千出掠將近羅家壩時壩中團勇萬皆鄉民不習戰

聖武記

卷一

四

聖政記 卷一  
臨敵不及五之一。餘皆遠屯數十里。或十餘里。思舉廁其間。獨身遇賊前鋒數百。詭呼曰數十賊耳。直前搏戰。衆聞賊少。氣倍爭奮。遂敗賊。乃獻俘獲於游擊羅定國。定國使偵賊豐城。還報請率死士夜擣其巢。而伏官兵五百爲外應。夾擊可一舉滅賊。軍中咸狂之。且謂賊間諜思舉憤官兵養賊。乃自請火藥數觔。夜獨往賊寨。深入得矛積火焉。風烈火熾。賊黑夜自相蹂殺。謹諫震天。奪路走。顛崖踏死無算。思舉乘亂跳身還。以無官軍邀擊。故賊得盡奔南壩場。弃器械牲畜山積。是役以一夫走賊數萬名。震川東鄉。勇從之者如歸市。於是自成一隊。

號羅家軍。屢殺賊。而某弁者冒其功受賞。益慕思舉。諸官奪其器械。散其旅。會四川總督英善聞之。給七品頂戴。檄隸副都統佛住於東鄉。時嘉慶元年。思舉年三十有三矣。時川賊最彊者。川北則羅其清。冉文儔。川東則徐天德。王三槐。適徐王二賊合窺東鄉。屯城河對山。佛住恃烏合鄉勇數萬爲援。惟扼河守。思舉白佛住曰。偷渡不可防也。賊方張。請濬濠設柵。增城垣。備積石以守。不聽。思舉策其必敗。遂赴知縣劉清軍於方山坪。羅其清素德劉清。清欲招降之。無敢隨往者。思舉請行。遂同入賊營。慷慨說賊。賊若降。次日復持檄往。賊以思舉

同姓畱飲款我軍虛實思舉知賊無降意詭詞回營則空無一兵蓋劉清聞賊陷東鄉害都統恐二賊合攻已拔營宵遁矣賊亦探官軍去急遣百餘騎禦而追思舉會晨大霧免於是徐王二賊分據石子坪香爐坪衆各萬思舉復請夜襲香爐坪賊巢而伏精兵外應參贊德楞泰許之梯緣絕壁而上伏火藥十餘處會大雨不遂翼日賊覺遂弃寨宵遁自是以藍翎千總常將鄉勇分道爲奇兵與川東官軍犄角二年徐王二賊敗走雲陽將與白崖山陳家山二賊合思舉以鄉勇繞開縣出其前途獲賊謀知王三槐遣約陳家山新起賊合拒官兵

卽冒所獲賊白旂夜馳抵陳家山聲言白號賊至賊四百餘貫下山迎思舉坐壘門令能誦邪教者釋械入後營見老師傅悉誅之賊至死號呼稱我實白蓮教非紅兵蓋呼官兵爲紅兵也賊首張長庚方屯山上望覺奔遁出兵揜擊殲禽四千人釋其不能誦邪教者二三千雲陽新起賊一舉除宜綿奏補夔州左營千總思舉戰功上聞始此三年勒保誘執王三槐於雲陽餘黨冷天祿猶負嶠安樂坪大兵環攻三月不下思舉復請刦賊寨梯絕壁上守柵賊恃險酣寢盡刃之縋引死士千餘入其三柵乃縱火深巢昏黑橫突萬衆中將明殿旅出

寨大呼曰吾豐城劫寨羅思舉也賊膽落潰圍走官兵邀斬無算旋爲額勒登保所殲川東賊由此不振會德楞泰圍川北羅冉二賊於大鵬寨三月不能破思舉徧相地勢曰賊各隘皆壘石嚴守惟山後懸削數十餘丈賊必恃險請絙巨竹數十爲長梯每尺間以踏繩倚諸絕壁而兩面以人持其長維官兵日夜攻其前使不暇他顧則可乘間擣也許之乃從死士四十各爲暗號攜火彈宵攀而上官軍望火起萬礮齊逼惟畱一路以縱賊賊夢中起昏黑相殺爭墜死無算其由一缺逃死者均爲伏兵所殲共殲賊五千俘七千而四十人無一傷

者德楞泰計賊必遁回方山坪舊巢使總兵朱射斗以兵三千據其寨而思舉伏鄉勇千餘於隘薄暮賊果至伏兵格之賊突奔山上復爲官兵壓擊圍斬幾盡次日搜獲羅其清於山嗣奏擢守備川北賊自此不東擾四年隨參贊德楞泰剿冉天元于江油馬蹄岡過賊七伏始獲賊謀知已陷伏中間賊各攜毛竹牌夾溼絮以禦矢銃乃急令兵多拾雹石未里許伏果起官軍矢銃不能制各路皆敗惟左路亂石雨擊賊皆棄竹牌反走絆蹶滿路追斬千餘遂救參贊于前山咫尺相及轉敗爲勝思舉冒所獲賊旗以追賊復殲賊首雷士王於新市

聖正言 卷十  
場進攻火燒寨崖周環如堞賊伏堞中矢銃不入欲俟  
我矢硝盡而乘我乃令軍士皆仰空射矢雨其寨賊譟  
亂遂蛾傳乘之賊奪隘奔潰自是不敢迎戰望風其遁  
復渡嘉陵江而東矣時勒保復以六品領隊大臣來川  
桂涵患七十五死戰恆欲隨勒保自是遂與思舉分路  
會陝賊入川連敗薛大烈桂涵兵於開縣思舉隨七十  
五赴之請分兵間道繞出賊後七十五以路險不許徑  
擣當加灣而思舉潛用鄉導趨後路適賊已推提督軍  
恃勝不設備鄉勇乘後山突潰之逐北二十里當山隘  
有巨窾深不則左右兩崖賊被追急陷其中者千餘禽

斬數千俘賊首向入竝奪回薛大烈敗軍所失騾馬所  
械無算時提督七十五已劾思舉違節制至是乃大喜  
遙望追回其劾云自是隨七十五轉戰川陝湖老林間  
賊無定勢兵無定向其在房竹間缺糧七日煮馬韉皮  
嚼賊肉以追賊視前戰川東北時尤艱苦復偏賊苟文  
明等自湖北入川由大寧太平出山向通江巴川時鄉  
勇半載未領糧餉衣狗皮躡草屨人皆呼口丐兵及戰  
勝則笑曰丐兵破賊至是追賊過達州六日補領兵餉  
士氣始飽會七十五以事被逮思舉檄赴參贊軍而川  
北賊張天倫魏學勝焚掠儀隴屢敗總兵田朝貴七年

聖正三  
正月勒保檄思舉往援。賊狂田朝貴易與專蹈其瑕。思舉乃繞道還。冒田總兵旂。賊望見爭趨之。爲我軍所破。而他鄉勇冒思舉八卦旂者。賊望見輒反走。後大破賊於東鄉。斬張天倫。魏學勝。又禽劉朝。選於老林。破齊國。點於通江。又與總兵羅聲。臯禽張簡。羅道榮於巴州。勒保皆以其功。子他將。劇賊熊八者。曾害提督穆克登布於南江。動以伏陷官兵。奉旨嚴捕解京者也。思舉俘諸太平之仙女寺。并獲穆克登布所

佩銅佛洋表。經畧額勒登保大喜。設提督位而磔祭之。然勒保已先奏。參將陳弼於大寧。斬熊八矣。如不能復奏。何。八年秋。三省肅清。奏以寧陝鎮總兵揚芳。專搜陝賊。而思舉以太平協副將。專搜川賊。深窮太平。大寧。開縣。通江。各萬山中。又二載始靖。餘孽云。而十年七月。復有陝西寧陝鎮兵之變。思舉聞變。欲以太平協兵千餘。裹糧疾趨。揜其不意。而署太平同知袁詩秀。以越境不肯備餉。阻其行。後賊破洋縣。遂脅從數

千德楞泰至調兵萬餘剿之。僅以招降藏事。自是川陝兵果數叛。明年西鄉瓦石坪營兵變。思舉急選兵三百。以其半扼竹峪關。而自率其半。三晝夜馳至西鄉。據山多張幟爲疑兵。俟二更下山襲之。則賊已遁。同巢副將祝廷彪又遣卒來言已赴賊營招撫。約勿擊。思舉陽諾而疾馳。壓其壘。賊傾壘出。我軍乘高雨石奮擊。每卒皆長驅數十賊。遂追入巴山。與陝兵合蹙之。是役微思舉神速。賊幾再滋。蔓由五郎兵變。姑息致。

此云思舉十八年擢重慶鎮總兵二十一年

命討川西徼外中瞻對番酋破之道光十一年

命剿湖南永州江華瑤趙金龍別詳湖粵平徭記。然其奇功皆在未建節鉞時。軍中號曰羅必勝。言晦夜劫營必勝。崖溝問道必勝。冒旂誘敵必勝也。江華小捷。懋賞世封。天以追酬川陝百戰之勞云。魏源曰。思舉忠孝人也。其始軍中蓋莫知所自來。及爲副將。自檄川陝湖北各州縣銷積案數十云。所捕劇盜羅某。今已爲國



宣力其母復株連世始知其所自來云源嘗遇諸川東道署酒酣袒身相示自戰創班班外爲親到股痕七左股四右股三世不知思舉乃以藥馬叱咤豪思舉也

桂涵者與羅思舉皆東鄉人膽智趨捷不知生產橫行鄉里屢觸禁網遂不知所之時或見於人家屋瓦上及幽崑邃洞荒寺敗舍間足嘗裹鍊沙數十斤蓬頭敝屨行千里外聞川楚軍興官募義勇皆來歸各起鄉兵以拒賊時陷賊瑕或昏夜獨入賊營往返數四賊來報復

柳遠賜已復左右擾之往往數十騎走賊萬衆由是兩路義旅遂爲川東北最涵初與其父桂天聰率族黨起義屯鑽子山萬賊來攻涵率壯士數十伏隘大呼躍出賊辟易走又嘗從官戰潰涵率其伍伏林莽伺賊過反擊其後搏大勝暮營山上徧燃草樹爲號賊知涵兵少張虛勢夜半襲之則空營忽鼓譟伏四起賊不測反走歸路已爲木石塞斷大潰天明仍不見一卒其權奇多類此嘉慶三年三月從總兵朱射斗攻徐王二賊於金莪寺垂破擲火觸柵倒焚硝桶盡轟驍賊乘勢出突官兵且戰且退至山半被圍數重涵率寨勇據山旁二硿

乘賊與官兵戰出截其尾襲其巢賊始潰退回攻二砦積柴巖下熏之砦中扇以風板煙焰四散賊掘山溝灌砦中開竇瀉之又兩山築望樓賊諜來探者輒銃斃之賊患寨勇與官兵犄角遂移屯重石子香爐坪朱射斗躡其後涵及思舉各伏鄉勇伺賊渡溪河突出扼擊之賊自相蹂躪溪爲不流五月官兵追香爐坪賊而西時達州東鄉太平新寧民被賊焚掠圖報復者聞之爭挾矛矢來追及賊淨土庵德楞泰明亮穆克登阿朱射斗四軍扼其四面賊攻朱射斗營自晨至午營垂破忽鄉勇四山蠶擁而出不知其數各標樹葉爲號涵及思

舉倡先陷陣呼聲震山谷賊寨火藥忽發煙塵漲天勢土崩尸積數丈斬教首孫士鳳官兵又礮擊其窟賊賊縊林中相望樹爲之折明年林木皆爲屍氣蒸死自賊起以來無此大創餘賊二三千北走太平泥沒頂踵無復人形沿途寨民爭擊東西鼠竄蜀賊莫猖於徐王至是大蹙使非湖北齊三氏姚之富等相繼入川則不再戰而殄矣四年二月副都統德楞泰擊徐天德於長壽之雲臺鋪參贊額勒登保引勁騎橫衝之賊大潰追及平井鋪賊詭令婦女肆酒食以待追兵前隊至正饑渴就飲食爲伏賊所害涵及思舉領鄉勇至敗之又轉戰

及開縣之白橋賊伏騎橋左右而整衆橋東以待德楞  
泰望之曰是有伏令涵思舉出其左他將出其右自率  
中隊馳之賊大北五年閏五月涵從阿哈保等追高馬  
二賊於龍安分營兩山左右涵率鄉勇百人馳之賊辟  
易官兵不繼進賊回攻兩山軍軍潰入林會暮微雨賊  
退涵集潰卒從林中突出截之賊疑中伏亦大潰是時  
奉旨拓撫脅從罔治而賊探騎所至揭去膽黃解  
散無幾至是涵從朱射斗敗王光祖于雲陽縣降賊數  
千縱其首李甲歸營招其餘黨列械前行于是降者日  
至明年桂涵從薛大烈阿哈保等別屬勒保始與羅思

舉分路六年正月殲李顯必于店子河九月追賊墊江  
賊畏素倫射手夜走鄰水大竹涵料賊必趨達州先往  
伏衛家溝蓐食待戰賊果至伏起與大兵夾殲之十一  
月涵以游擊隨薛大烈追李彬冉天士等賊於通江至  
小中河天大雪賊謂官軍必不出酣歌不爲備涵領鄉  
勇冒雪宵進官軍不得已隨之四鼓抵賊壘賊巡析者  
畏寒皆縮伏帳中黎明四面乘之賊望平曠奔軼遇索  
倫勁騎無一免者七年六月涵以參將追徐天德至絲  
羅壩垂獲而左右寨民不辨疑官兵爲賊截其追路適  
總兵田朝貴伏兵於前徐天德誤奔入涵至夾攻獲焉

大抵賊將至，輒以探騎先。一騎被殺，則他騎皆反報。大隊先遁，或預備以待。涵每伏勁卒，俟其探騎過，則全殲之。而突衝其大隊，每獲奇捷。自後轉戰開縣、新寧、太平、大竹、東鄉、長壽、忠州、鄰水、江北廳，斬獲二三千，皆殘敗之賊。無大戰，故不具書。其戰江北廳也，軍方勝於秦羅坪，夜犒賞酣飲，賊突出老林，大呼偪壘，衆皆失措。涵堅壁不動，比曉逐之，斬其渠而還。其富河場之捷，獲賊數百，檻送長壽縣，方殘破無監獄，繫諸鼓樓，三更乘守兵睡熟，羣破械焚殺。涵聞夜馳二百里，一鼓禽之。其在雲陽，適經略追苟文明餘黨至太平，大軍尙未至，賊營山

上燎新禦寒。涵率數十卒，夜至，使半伏河岸，半襲山上。賊驚潰，爭跳崖下，岸兵騰躍斬之，如刺飛禽。軍中語曰：戰莫樂崖下。所八年五月，經略參贊會兵三省之交，分兵搜捕老林路險餉艱，且皆百戰猾賊。涵及思舉夜襲賊於太平之望鄉臺，賊先有備，分隊出我陣後，鏖戰竟夜。月斜，衆星亂墜，兵與賊俱潰。涵思舉收軍犒士，約翌日決破賊。比曉，賊已入陣突鬪，聲振山谷，兵賊皆力盡乃退。九年正月，賊復闖入老林，官兵鑿山伐木，通道山谷巖絕，軍不成隊，糧不濟，飢軍中語曰：鬪莫苦穴中。鼠九月，涵以副將從經略參贊圍餘匪於太平之火燒梁。

聖正詩 卷十  
山峻無路。涵計賊圍久。必出劫。洞糧。請以步兵繞伏山後。從之。竟日始出。山背賊驍銳千餘。果至。殺傷相當。諸將以此。次不滅。賊將更滋蔓。皆死戰不退。半日。竟殲之。于是前山拒守者。皆膽落。不日殄盡。川陝肅清。十年十二月。綏定府復有新兵之變。初寧陝叛兵招撫後士驕甚。流言無忌。有綏定管兵陳得先等。中途以借餉圍脅。營弁羅思舉策其歸。必變。密札綏定守備王國雄。令遣悍卒。因事過太平。欲便宜誅之。王國雄以已非太平屬。置不答。及是果爭餉激變。國雄及兵備道嚴世鏐。知府王世濤。皆踰城遁。知縣余永寧朝服升堂。諭賊使出城。

受約束而募勇守城。桂涵率親兵百人馳至。合鄉勇一鼓禽斬之。桂涵以川北鎮總兵至四川。提督道光十年卒。今內地用兵。動募鄉勇。莫難于統領。號令之人。羅桂其著者也。詩曰：修我戈矛，與子同仇。二將有焉。

附嚴如煜前後鄉兵行

前篇曰：紅旗悠悠，土城頭繞。城畫角雲慘愁。羽檄星馳，募鄉勇。大旗小旗，森戟矛。鄉中豪俠，子亡命。身未死，乘時待。入驃騎營，誓取功名。如折矢夜宿。沙場刁斗鳴，酒酣高唱。氣驕橫。黃巾十萬，勢洶湧。外圍軍門雲不動，排弩架炮守壘營。將軍有令，須持重。豈無中黃育士軍，合森嚴。稟相奉，鄉兵憤。怒火出鼻，大呼陷陣。萬夫辟頃刻，驅狼若驅羊。諸軍鼓譟，踵相繼。爬巖翻箐，無處尋巖懸。削瓜箐屯。雲憑高負險，侮我軍。仰視墮帽徒，怒噴將軍下。令懸重賞，執擒賊者銀千兩。幾輩負賞不顧生前者。

頂糜後者上藤繩纒縛獻軍門一軍歡喜得好仗  
推牛饗士軍筵設夜奏甘泉月三捷幾番開庫賞  
鄉兵謝恩叩頭頭有血歸來就地作博場俄頃千  
金如沃雪前日班師撤歸里中有一人泣不止十  
年百戰掃櫓槍兩手依舊空男子悔要銀錢不要  
官那有功名誇閭里  
後篇曰大紅旗小紅旗大小黃旗其迷離七星蜈  
蚣稱健兒五日十日道路壅居人慄慄行人悚聽  
說前途徹鄉勇鄉勇十人九頭劣中有一人獨悲  
咽哀哀細從召募說憶昔苗疆歲乙卯烏巢河畔  
隨征討蠻鎗亂射百無虛火伴都死一身保聽說  
妖氛起荆襄達州劇賊尤披猖無顏面回故里  
報名再吃鄉兵糧夔府作軍探湖北又河南最後  
隨營過曉關輾轉黑河大巴山老林百日無完衣  
肘見踵夾血流腓一饑二十錢甜米斗二下扳得  
包穀作晚饗青桐樹溼燒不然昨到興安城糧船  
如魚鱗又見守營卒箇箇衣展新殺賊要鄉勇受  
賞偏說冊無名十年凱撤人已老欲補新兵糧額  
少賞金多被領旗抽區區微勞誰見收功不收亦  
無愁依然無面回鄉里甘心老向南山死

嘉慶畿輔靖賊記

國家自嘉慶七年川陝戡定十三年靖閩粵海寇十六  
年辛未春天子方舉西巡狩之典幸五臺示得意  
而有星孛紫微垣占主兵越二年則有天里教匪之變  
天里教者亦名八卦教聚眾斂財愚民苦胥吏者爭與  
焉而河南滑縣李文成直隸大興林清爲之首方是時  
溫承惠總督直隸高杞巡撫河南同興巡撫山東文成  
各賊益妖煽其眾指星象應在十八年秋九月十五日  
午時文成黨數萬最盛而清則密邇京邑賄通內侍外  
倚文成之眾爲援將乘駕幸木蘭秋獮回鑾時伏

聖訓 卷十  
莽行在謀定而中外莫知也。秋滑縣知縣強克捷聞之，密封白高杞及衛輝府知府郎錦騏請兵掩捕，皆不應。克捷乃捕李文成下獄，刑斷其脛。賊黨以事迫不能俟，期遂于九月初七日聚眾三千破滑，出文成于獄，強克捷死之。於是直隸之長垣、東明、山東之曹定、陶金鄉同時殺官圍城，而曹定、陶皆破。事聞，命溫承惠會同高杞同興討賊。諸賊既倉皇起事，遂不及赴。林清外應之約，林清及期則使其黨二百餘輩由宣武門潛入內城，藏兵械混酒肆中。日晡分犯東華、西華門，白帕其首為號。太監劉金等引其東，高廣福等引其西，闖進喜等

為內應。而清自居黃村，尙凱河南賊集而後進。時東華門甫入數賊，卽為護軍關門格拒，奔散。其入西華門者八十餘賊，反關以拒官兵。賊得內監鄉導已知，大內。在西而誤由尙衣監文穎館，斬關入侍衛。急閉隆宗門，賊至不得入。總管太監常永貴縛由東華門入之二賊于蒼震門。皇子等在上書房聞變。皇次子急命進撒袋烏銃腰刀。命諸太監登垣以望賊。俄有手白旗攀垣將踰養心門入者。皇次子發烏銃殪之。再發再殪。貝勒綿志亦以銃殪賊，賊乃不敢越垣而進。將火隆宗門，而留守京師諸王大臣率禁兵自神

武門入衛敗賊中和殿門外薄暮忽大雷電數賊震死  
武英殿之御河餘股栗竄匿先後就禽并禽通賊諸內

監十六日 皇子諸王大臣皆飛報 行在初

上行獮至伊瑪圖將進哨忽山潦驟發遂旋蹕

命 皇子先歸故得靖內難及得警報則 駕已

至白澗時 京師連日大風揚沙晝晦謠言四起驚

擾達旦十七日 上自白澗回驛駐煙郊 下詔

罪已并責中外諸臣泄沓尸素致釀漢唐宋元明以來

未有之禍以功封 皇次子智親王貝勒綿志進郡

王銜諸大臣賞黜有差以尙書英和代吉綸為步軍統

領是日禽林清于黃村十九日 駕自煙郊還宮人

心始定焉 上御瀛臺親訊首逆及通賊太監皆磔

之傳首畿內李文成既據滑以脛創甚不能出四方為

流寇遂出兵圍濬而萃精銳于道口鎮道口距滑十八

里臨運河有積糧賊恃以戰守且為長垣東明曹定陶

金鄉諸賊號召時溫承惠督兵大名巡撫高杞軍濬皆

按兵不動而山東巡撫同與聞報踰旬不發兵鹽運使

劉清力爭始發乃 詔以陝甘總督那彥成代溫承

惠佩 欽差大臣關防節制山東河南兵剿賊陝西

提督楊遇春副之又調滿洲健銳火器營兵千及西安



徐州兵數千十月楊遇春至衛輝即日率親兵八十由  
運河西進覘道口遇賊數千即大呼突擊賊辟易追渡  
河禽斬二百餘賊敗入道口遇春出陣數親兵少二人  
復衝入賊隊奪還二屍賊眾奪氣遇春還北岸斷浮橋  
焚渡船欲即營其地扼賊咽喉高杞等不可時那彥成  
已至衛輝聞滑賊盛請俟調山西甘肅吉林索倫兵五  
千而後進詔切責之亦馳至軍時楊遇春以固原  
兵擊賊連斬獲二十七日官兵會攻道口遇春自衝其  
前所嚮賊望見髯將軍輒披靡大破之又敗滑城來援  
賊二千遂奪道口燒賊萬計復擊走桃源賊三千于城

東進圍滑方是時

上命尚書托津統吉林索倫兵

以辦直隸開州之賊又命副都統蘇爾慎往山東  
助剿曹州時金鄉以知縣吳階守禦得不破而山東鹽  
運使劉清故在四川將鄉兵剿賊有名至是以文吏將  
官兵大破曹州賊于定陶之髣山復定陶十月劉清復  
破賊韓家廟再破賊扈家集皆劉清身先士卒而總兵  
陳某反隨後策應云于是山東賊略盡命蘇爾慎  
回開州助托津會剿十一月破賊數千于湯二莊署直  
隸總督章煦復奏禽滑縣賊首馮克善于獻縣直隸之  
賊亦定乃詔索倫兵悉赴河南滑縣爲古滑州舊

治城堅厚外磚內土中沙大礮攻之遇沙而止賊運道  
口糧峙其中足支一載嚴脅居民無敢內應官軍圍滑  
三面惟北門隔葦塘未合圍于是桃源賊首劉國明潛  
入滑護李文成出收外黨西入太行爲流寇計文成脛  
創不能騎乃輕車出北門招賊四千人輝縣山據司寨  
那彥成遣總兵楊芳追之十九日伏騎白土岡誘賊出  
司寨佯走伏起敗之又追擊于南首山殺賊二千餘進  
奪司寨李文成縱火自焚死獲其屍官兵齊集滑晝夜  
環攻而陝西三才峽賊又起于是 上督諸將刻期  
被賊先是城外連掘地隧十餘皆爲賊覺或水灌之或

濠截之至是楊芳佯築他柵進攻而潛掘舊隧滿貫火  
藥至期官軍皆三里外甲騎以待十二月十日平明城  
西南角雷轟地震崩裂二十餘丈磚石滿空賊燒震死  
千百官軍奮前奪城及晡諸將各蟻附而入巷戰至夜  
又殲其昏黑突圍之賊三千餘先後共殲賊二萬免老  
幼男婦二萬有餘俘賊首牛亮臣徐安國等檻獻京師  
滑縣平 加那彥成太子太保 封三等子楊遇  
春三等男諸將士楊芳劉清等以下賞賚有差惟溫承  
惠以賊起 畿甸不覺察又將兵逗留降黜而豫親  
王以先期聞賊黨祝顯逆謀不舉發削 封爵以強

克捷首發賊功

賜諡忠烈世襲輕車都尉韓城滑

縣各建專祠復

命那彥成等會剿陝西三才峽箱

賊箱賊者南山木商夫役歲饑停工掠食吏捕之有萬  
二者煽眾入山巡撫朱勲遣吏講解賊益恣眾至數千  
燒木箱朱勲遂以教匪聞總兵祝廷彪吳廷剛等屢破  
斬之餘賊悉降時十九年正月也自賊起事首尾五閱  
月騷動四省而是秋黃河又決儀封軍饗宣防交急司  
農竭蹶于是吏部侍郎吳璫復請開捐例議者以賊起  
多由吏饗民困今復開捐輸是吏治重弊也久不決  
上乃下詔曰開捐助帑原非得已之政使籌畫有方

朕亦何樂是舉邇因軍餉河工經費浩大命諸臣籌裕  
餉之策類皆空言無事實最後英和一疏極陳開捐之  
弊而請復名糧開礦賑事亦難行中外大臣食君之祿  
皆當忠君之事果有生財裕餉之方但封章朝聞則捐  
例夕罷若徒爲書生陳言朕久已熟聞無庸贅瀆也于  
是大學士董誥請京兌稱贏二兩兩江總督百齡請增  
典商息三分上皆以非政體留中而捐例遂復開  
一如乾隆川運嘉慶川楚土方衡工工賑之例自十九  
年四月至明年五月乃止謂之豫東例

五言古詩

卷一

五

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

五言古詩 五言古詩 五言古詩

